



Notat

Dato: 15.01.2019
Arkivsak: 2014/22155-11
Saksbehandlar: katclar

Til: Fylkesutvalet

Frå: Fylkesrådmannen

Rapport frå Generalforsamlinga i CPMR 2018

Innleiing

Hordaland fylkeskommune er medlem i Nordsjøkommisjonen (NSC) og «Conference of Peripheral and Maritime Regions» (CPMR). NSC er ein politisk organisasjon som blei oppretta i 1989 som ein arena for regionar rundt Nordsjøen kor dei kan samordne interesser, utveksle erfaringar og utvikle politikk. Organisasjonen er ein av seks europeiske kommisjonar under paraplyorganisasjonen CPMR.

CPMR er ein tenkte-tank og lobby-organisasjon som består av omkring 160 regionar frå 25 land og representerer ca. 200 millionar innbyggjarar. CPMR arbeider for ein meir balansert utvikling i Europa med fokus på regional- og samhørighetspolitikk (Cohesion policy - EUs regionalpolitikk), transport, maritime spørsmål og energi. Både CPMR og Nordsjøkommisjonen tilbyr fylkeskommunar frå ikkje-medlemslandet Noreg, eit unik handlingsrom for påverknadsmoglegheit når det gjeld den europeiske dagsorden med relevans for Hordaland og Nordsjøområdet.

Medlemskap er basert på ein årlig kontingent. Hordaland fylkeskommune betalar medlemskontingent til både NSC og CPMR og deltek kvart år på årsmøtet i NSC i juni og på Generalforsamlinga (GA) i CPMR i oktober/november viss det passar slik.

I 2018 deltok Roald Kvamme på Generalforsamlinga til CPMR i Funchal på Madeira 17.-19. oktober på vegne av Fylkesordførar, saman med ein representant frå Internasjonal gruppe i HFK.

Dei andre norske medlemsfylka som deltok på generalforsamlinga var Østfold, Telemark, Vestfold, Aust-Agder, Vest-Agder, Rogaland, Møre og Romsdal og Trøndelag.

Dei norske medlemmane deltok på ein telefonkonferanse i forkant av generalforsamlinga fredag 5.oktober. CPMR hadde ikkje sendt ut saksdokument på dette tidspunktet og det var vanskeleg å ha konkrete diskusjonar. Anders Lervik frå Østfold, som er visepresident i Nordsjøkommisjon, leia møtet. Marianne Chesak frå Rogaland er norsk vararepresentant i byrået (Political Bureau) for CPMR og fremjar saker i komiteen som dei norske medlemmane ønskjer å få fram. Gunn Marit Helgesen er visepresident for økonomi i CPMR.

Dei norske medlemmane pleier òg å samle seg i forkant av sjølve generalforsamlinga, og Marianne Chesak kalla inn og leia dette møtet i Funchal onsdag 17.oktober. Då hadde CPMR sendt ut sakspapira og eit forslag til slutterklæring frå møtet. Dei norske medlemmane fekk høve til å diskutere punkt som dei ville endre eller justere i slutterklæringa. Jon Halvard Eide frå Vest-Agder la fram ei formulering til desse og dei andre deltagarane frå Noreg støtta framlegget med presiseringar.

Det var også eit forberedande møte for medlemsregionar i Nordsjøkommisjonen torsdag 18.oktober. Tema i dette møtet var og hovudsakeleg slutterklæringa. Deltagarane diskuterte presiseringar og endringsframlegg frå medlemmane.

Generalforsamlinga

I opningstalen gjekk Vasco Cordeiro, president i CPMR, til angrep på EU-kommisjonens forslag om budsjettkutt i det han vurderer som sentrale politikkområde for EU. Han var spesielt opptatt av kutt under samhørighetspolitikken, ein politikk for økonomisk, sosial og geografisk utjamning mellom regionane i EU. Han meiner at det er naudsynt å vere progressiv og nyskapande i forhandlingane om eit nytt langtidsbudsjett for EU 2021-27. Dette er spesielt utfordrande sidan Storbritannia forlèt EU, men han understreka samstundes at langtidsbudsjettet òg må stimulere til aktiv deltaking frå det regionale nivået.

Første sak på møtet var årsrapport til CPMR. Eleni Marianou, generalsekretær i CPMR, meinte at EU sine innbyggjarar i dag går gjennom ei tillitskrise. Fleire medlemsland utfordrar no det europeiske rettssystemet og innbyggjarane slit med framtidens frykt, ikkje minst på grunn av dei store globale konfliktane. Det er likevel positivt at det har vore økonomisk vekst i 2018, og sjølv om det ser ut til at den blir svakare i 2019, går det likevel framover.

Jean-Claude Juncker, leiaren for EU-kommisjonen, sa i State of the Union-talen til Europaparlamentet, at målet for EU må vere eit sterkt og sameint Europa, som beskyttar sine innbyggjarar. Samstundes står EU overfor store utfordingar som migrasjon, usikkerheit om euroen, globalt handelsregelverk, Brexit og rettsstatusen i fleire medlemsland.

CPMR meiner at EU-kommisjonens forslag til langtidsbudsjett 2021-27 ikkje er ambisiøst nok, og noterte at Juncker ikkje nemnde samhørighetspolitikken i State of the Union-talen. CPMR meiner at regional og lokal medverking er naudsynt for ein god utvikling i Europa, og at regionane er motorane for vekst.

Sak to handla om «**Europas framtid**» og blei innleia med eit kåseri ved tidlegare medlem av Europaparlamentet, Sir Graham Watson. Han leia òg sesjonen på ein inspirerande og humoristisk måte. Andre innleiarar peika på kor viktig det er å involvere innbyggjarar for å unngå motstand mot prosjekt/tiltak som er utvikla sentralt. Det ligg eit u-utnytta potensiale i regionane som må vere ein drivkraft for dei 3 T'ane «Talent, Trust, Tolerance».

Sak tre handla om ein **integrert maritim politikk (IMP)**, og diskuterte hovudsakeleg forslag til nytt regelverk 2021-27 for det europeiske maritime fiskerifondet (EMFF). Forslaget til EMFF inkluderer tema som berekraftig fiskeri, forvalting av marine ressursar, mattrylegikk, blå vekst og forvalting og styring av sjø- og havområde. EMFF vil bli styrka i 2021-27-perioden og blå vekst blir meir og meir viktig. Det er også viktig med ein stor innsats mot marint søppel.

CPMR presenterte sine aktivitetar under IMP. Aktivitetane dekker ulike område som investeringar, næringsutvikling, fiskeri og akvakultur, tiltak mot plastikkforureining, utdanning og opplæring, samt kystsoneforvalting. Fleire beklaga at budsjettet for EMFF er redusert med 13 % i høve til inneverande periode, og at ein høgare del av midlane skal under direkte forvalting av Kommisjonen. Ein representant for DG Mare opplyste at maritime næringar kjem til å vekse raskare enn resten av økonomien. Han opplyste at Kommisjonen ønskjer å leggje til rette for investeringar i den maritime sektoren, at dei satsar på blå vekst

og blå investeringar. «Havbassengstrategiane» (Sea basin strategies) til EU spelar ei viktig rolle i dette arbeidet. Nordsjøområdet manglar ein slik strategi på EU-nivå.

Val av medlemmar til byrået (Political Bureau) var siste post på programmet på dag ein. Gunn Marit Helgesen blei valt på nytt som medlem med Marianne Chesak som vara. Det vil seie at det blir ingen endringar i den norske representasjonen.

På det etterfølgjande **møtet i byrået**, blei Vasco Cordeira valt for ein ny to-års periode som president for CPMR og Gunn Marit Helgesen blei valt på nytt som 1.visepresident og kasserar. Byrået godkjente også forslaget til budsjett for 2019.

Dag 2 starta med sak fire, **tilgjengelegheit og transport**. Denne saken handla om EU-kommisjonen sitt forslag til regelverk for infrastrukturfond (CEF – Connecting Europe Facility) for 2021-27. CPMR ønskjer meir fokus på dei perifere områda og meir stønad til hamner og sjømotorvegar «Motorways of the Sea». Eit viktig spørsmål er også om hamneutbygging skal bli ein del av CEF. Ein representant for EU-kommisjonen sa at kommisjonen var villig til å vurdere dette i høve til Motorways of the Sea.

Femte sak handla om **samhørighetspolitikken** (Cohesion policy - EUs regionalpolitikk). CPMR har eit stort fokus på dette politikkområdet og har utarbeidd over 50 endringsforslag til budsjettforslag frå Kommisjonen. Dei har fått støtte for dei fleste av desse under komitébehandlinga i Europaparlamentet.

Fleire medlemmar meiner at forslag for kutt i Cohesion-budsjettet, og i budsjettet til Interregprogramma er beklagelig og liknar på ein slags «re-nasjonalisering» av regionalpolitikken. Representanten frå Kommisjonen understreka at det er naudsynt at Interregprogramma blir meir effektive og difor kom det forslag om å omorganisere dei grenseregionale programma. Forenkling er og eit viktig mål i omorganiseringa.

Etter denne saka, var det to parallelle sesjonar, ein sesjon om migrasjon, og ein om klimaendringar. Utvalde medlemsregionar presenterte prosjekt eller «good practice», og deretter var det open debatt og diskusjon blant deltakarane. Det vart lagt merke til en klår geografisk skilnad – medlemmane frå Sør-Europa hadde stort sett meldt seg på sesjon om migrasjon mens dei frå Nord-Europa deltok på sesjonen om klimaendringar. Dette fortel noko om kva for utfordringar og prioriteringar medlemsregionane står overfor.

Den neste saka var ein interaktiv sesjon for å samle idear for ein **ny langsiktig strategi for CPMR**. CPMR ønskte innspel frå medlemmane om kva dei vil prioritere og korleis dei best kan levere tenester til medlemmane.

Sak ni fokuserte på arbeidet med **EU sitt langtidsbudsjett 2021-27** (MFF – Multi-annual Financial Framework).

Til slutt fekk medlemmane høve til å debattere forslag til **slutterklæringa** frå GA. Slutterklæringa er eit viktig lobbydokument for CPMR og samlar dei viktigaste synspunkta om politikkområda dei jobbar med. Dette er eit overordna politisk bodskap frå medlemmar i CPMR til verden og gir retning for arbeidsprogram for organisasjonen fram til neste generalforsamling. Det inneheld 85 punkt i eit 10-siders dokument. Det kom endringsforslag til nesten alle punkta i sekretariatets forslag. Fleire var og grunnleggjande ueinige i sekretariatet sitt tekstforslag. Møtet vedtok samråystes slutterklæringa (endelig versjon vedlagt saken). Pays de la Loire-regionen frå Frankrike valte å tre ut av avstemminga på nokre punkt om migrasjon.

Rekneskap for 2017 og budsjettet for 2019 vart godkjent.

Ei ekstraordinær generalforsamling vedtok deretter mindre endringar i CPMR sine statuttar og til slutt presenterte tre nye medlemsregionar seg: Värmland i Sverige, Satakunta i Finland og Vest-Flandern i Belgia.